

25

WANTOK



Namba 143

Sarere, 10 Julai, 1976

Prais 10t



PAS I KAM LONG EDITA

MEMBA I TOKTOK STRONG LONG FAMILI PLENING LONG PNG

Dia Edita - Tenkyu tru long mi i kamap gen long Wantok Niuspepa long bringim tingting bilong mi long Famili Plening insait long dispela kantri PNG.

Long tingting na lukluk bilong mi long Famili Plening long dispela kantri PNG, ating em i wanpela bikpela rong tru na posin bilong dispela nupela independen kantri bilong mipela P.N.G. (1) Em i bikpela rong long ai bilong God. (2) Em i densa bilong dispela nupela independen kantri bilong yumi olgeta hia.

O tru, God i bin wokim manmeri na bihain em i tok long tupela olsem: Bambang yutupela i pulimapim olgeta hap long dispela ples daunbilo. Na long dispela i olsem, Famili Plening i bin bagarapim wok na plen bilong God long ples daunbilo.

God yet em i gat save na plen bilong wanpela wanpela manmeri em yet i putim long ples daunbilo. Sapos manmeri i no inap marit, em i olsem bambai em i no inap karim pikinini. Tasol manmeri i marit, em i mining bilong laik bilong em yet.

Sapos ol manmeri ol i gat tingting bilong marit, namba wan tingting bilong tupela long sindaun wantaim tupela, bambai tupela i gat pikinini i kamap namel long sindaun bilong tupela yet.

Mining bilong marit tru, em i bringim marit tru, em i bilong bringim kamap pikinini olsem bilong helpim God bilong mekim ol manmeri bilong pulimapim ples daunbilo. Wok bilong manmeri i marit, em i wanpela bikpela wok tru long laiptaim bilong tupela long dispela ples daunbilo long graun.

God na gavman i tok yu no ken kilim dai manmeri. Orait, long wok bilong Famili Plening, tru em i brukim stret dispela lo ya bilong kilim pikinini long bel bilong mama. Na hamas pikinini

ni manmeri i kilim long bel bilong mama? God tasol em i save long dispela samting.

Planti mama ol i kisim ol pils o marasin bilong stapim bel long karim pikinini. Tasol ol i no save hamas ol gutpela pikinini ol i kilim ol pinis long bel bilong ol mama long dispela marasin. Ol i ting ol i mekim wanpela gutpela wok tru. Tasol i no gat. Mi ken tok sori tru long mama i kilim pikinini long pils o marasin long bel bilong em yet. Kalopa long dispela mama. Rong bilong dispela mama i nogut moa, na kot bilong em bai i rong olgeta long bihaintaim.



Densa gavman tude i lusim planti mani na manmeri long Famili Plening long olgeta kona long dispela kantri PNG. I luk olsem 170 ples o klinik olgeta i mekim olsem. Olsem wanem tru? Em i orait long dispela nupela independen kantri? Mi ting em i no stret liklik tru olsem.

Papua Niugini, em i gat klostu 3milien pipel tasol. Em i no planti manmeri yet. Planti hap bilong dispela kantri i no gat manmeri. Ol enimel na bus tasol i stap. Sampela taun tu, i gat ol bikpela hap i stap nating, hausman samting i stap long en, na ples i no gat nois.

Sapos wanpela mama i kisim pils o marasin, hamas ol gutpela manmeri em i kilim ol pinis? Olsem bihain bai ol i ken kamap loa, bis-

nisman, tisa, minista bilong lotu, o gutpela save-man savemeri bilong ranim dispela kantri i go het gut.

Papua Niugini i lus yet long planti gutpela saveman bilong mekim olkain bisnis. Tasol sapos Famili Plening i go strong moa moa yet, em bambai yumi no inap long painim ol dispela gutpela pipel bilong dispela nupela yangpela nesen bilong PNG.

Damien Kereku, M.P.
Is Nu Briten Rijonal.

TOK AMAMASIM TOK PISIN

Dia Edita - I gutpela tru long olgeta manmeri i save raitim pas i kam long Wantok Niuspepa na autim wari, tok amamas, na ol narapela kain samting olsem long hap bilong ol o insait long Papua Niugini. Gutpela tru.

Tasol planti taim tru mi lukim ol ya i no tok pisin stret. Tru olsem pisin long Rabaul, o mobeta long hap bilong Is na Wes Nu Briten i narapela kain liklik long ol hap bilong Madang, Sepik na ol sampela narapela provins. Tasol Papua i no gat.

Planti taim mi save lukim Wantok Niuspepa na sampela man na meri i save tok inglis, taim ol i raitim pas. I no min olsem ol i laik tru long raitim pas, tasol ol i laik soim ol i save inglis moa long pisin. Taim yu laik rait long pisin, orait, tingim gut ol toktok na yu rait, plis ol wantok.

Ol kain kain tok olsem developim, merdering, agri, diferens, na ol planti moa. Yu ting bai ol man i no gat save long inglis bai ol i save long ol toktok yu mekim? Mi ting i no gat tru.

Bikpela laik bilong yu, taim yu raitim pas o salim toktok, yu mas tingim olsem ating narapela i save long wanem samting tru mi toktok long en o nogat? As bilong em i olsem, man i kisim pinis tok bilong mi olsem mi laik o nogat? Em i stret.

Sampela taim, as bilong tok i no kamap gut taim yu

putim tok inglis i go insait. Olsem na taim bilong bekim pas narapela poro i no bekim gut, tasol em tu i putim nupela tingting olgeta insait na bai yu tingting olsem, o mi no raitim olsem. Yu no ken putim hap inglis insait. Em i kranki.

Sapos yu no save tok pisin, orait, rait i go long Pos Kororia o maski, mobeta yu tokim wanpela poro bilong yu bai em i helpim yu.

Orait! Tok pisin em pisin na tok inglis em i inglis. Tupela i no ken abusim wantaim. Tupela i mas wan wan stret. No ken paulim nabaut ol wantok. Em tasol olgeta.
James G. Begani,
Mai/Kimbe.

YUMI MAS BOSIM KANTRI GUT

Dia Edita - Mi bin harim planti raskol i kamap long Papua Niugini. Na ol i wok long bagarapim ol stua na i stil. Ating dispela em i no stret. Mobeta yupela nau em yupela ol plisman na ol man bilong ples, yupela i mas painim ol na kisim ol i go long kot na kalabusim ol.

Sapos yumi no mekim olsem bai kantri bilong yumi PNG inap i go bagarap. Na ol narapela kantri bai ol i tok olsem kantri bilong yumi PNG em i kristen kantri ya. Em i tru o em i giaman?

Sapos em i tru, orait, yumi mas stretim dispela hariap. Nogut bai em i go bikpela na kantri bilong yumi i go bagarap olgeta.

Sapos kantri bilong yumi i kristen kantri, orait, yumi mas bihainim kristen pasin na wanem trabel o hevi i laik kamap long yumi ol PNG, orait, yumi yet i mas stretim kwiktam tasol. Em tasol wari bilong mi.

Don Tukayu,
Erave/S.H.P.

Raitim pas na salim i go long:
WANTOK
BOX 396
WEWAK

MI LAIKIM SOMARE I STAP YET

Dia Edita - Mi laik skruim yet pas bilong brata hia em Vincent R. Walmai. Em i bin tok olsem yumi no ken senisim Praim Minista bilong yumi, Mista Michael Somare. Ating tok bilong brata hia Vincent em i tru olgeta ya.

Insait long kantri bilong yumi Papua Niugini, em i no olupela kantri. Nogat tru ya. Em i olsem nupela pikinini nau tasol mama i karim.

Nau mi laik askim ya ol bikman bilong yumi long Papua Niugini. Em ol dispela bikman mi laik askim ol em ol memba bilong Haus ov Palamen. Sapos nau tasol yupela olgeta wan wan memba i planim wanpela liklik banana, na em i karim. Tasol, taim em i no redi yet, bai yupela i katim na kukim na kaikai, o bai i no gat tru?

Ating bai i no gattru ya mi tokim yupela. Na tu long kantri bilong yumi Papua na Niugini, em i olsem dispela liklik banana em i karim na i no redi yet long kaikai. So em tasol na tenkyu ol.

Ignas Wange,
Lumi/W.S.P.

DROPAUT TOKTOK

Dia Edita - Mi i wanpela standet 6 dropaut na mi wok long Jant Kampani hia long Madang. Na mi bin harim ol kaunsila i toktok olsem. Ol man i no gat save na i wok long ol kampani bai ol i pinis na i go aut na dispela ol 4,000 fom 4 sumatin ol i bin raun nating long taun, bambai ol i kisim nau ples bilong ol na ol i wok.

So mi ting olsem sapos ol dispela 4,000 fom 4 sumatin i kisim dispela ples bilong ol man i no gat save na wok na ol bai i komplek nabaut long mani, na kantri bilong yumi bai i go nogut olgeta.

So yumi gat planti graun na olsem wanem na kantri bilong yumi i no gat kain kain ol faktori bilong wok?

Sapos ol pikinini bilong yumi i winim skul na ol i no gat ples bilong wok, mi ting bai ol i raun nating long taun. Na yupela i lukim hamas sumatin nau ol i kisim trening long ol kain

kain wok? Ol dispela sumatin bai ol i kisim ples, na ol pikinini bilong yumi bai ol i lus tru long bihain.

Na olsem na mi tingting planti. Em tasol liklik wari bilong mi. Tenkyu tru.

Suput Pro,
Madang.

MEKIM DAI OL TOK KROS NAU

Dia Edita - Mi laik toktok liklik long Putim Trausis Priscilla Mirio i bin raitim. Ol meri i win na ol i kamap pinis long toktok insait bilong Yu Werim Blaus, Rita A. Kadado i bin raitim, Max W. Kunma tu i bin rait long Tambuim Trausis, long tingting bilong em yet long dispela wankain samting ya.

Mi autim tingting bilong mi, i no bilong helpim tupela bras, em long Paul na Max. Tasol mi man bilong raun tu na mi autim dispela tingting bilong mi. Pastaim long mi autim, mi laikim Priscilla na Misis Rita i tingting long dispela askim taim ol i wok long ritim. Wanem samting tru ol meri i winim na wanem samting tru ol meri i kamap long en?

God i bin mekim yumi olgeta na yumi i gat ol kain kain tingting. Long dispela tasol na yumi i gat ol kain kain pasin tu. Olgeta man i gat gras na olgeta meri tu i gat gras. Sapos yu i laik kamapim i longpela bai samting long hap yu stap long en. Sapos hetman i tok katim sot, yu harim em. Em i no tok, mekim olsem yu laik.

Ol hap bilong wokim siot, trausis, sket na blaus, ol tu i gat tingting long ol dispela samting: Siot bilong man, sampela kain ol trausis bilong ol man, na sampela kain trausis bilong ol meri, wankain tu long ol spot we. Siot em i bilong ol man tasol, olsem tasol long sket na blaus bilong ol meri tasol tu i wankain.

Orait, sapos yu kamapim gras bilong yu olsem yu i laik bai yu luk gut wantaim tasol, sapos yu yusim siot na blaus olsem yu laik. Na sapos meri i putim siot na man i putim blaus bai i luk kranki, bikos ol dispela samting i bilong yusim olsem ol man i bin wokim i bin laikim bai yumi yusim

TU MINIT TINGTING

GOD I STAP WE?

Olgeta de yumi save wanpela man o wanpela arapela samting i stap, long wanem yumi lukim mak bilong em. Yumi lukim mak bilong lek bilong dok, na wantu yumi save dok i stap. Yumi lukim haus, yumi save i gat man i stap. Yumi lukim bilum i hangamap, yumi save, meri i stap. Long krai bilong ensin bilong em, yumi ken save ka i kamap nau, o motobaik o balus. Yumi lukim smok, yumi save, paia i stap. I olsem: yumi lukim mak na yumi save wanem samting i stap. Em i pasin bilong yumi.

Long God i wankain. Em i no stap longwe long antap o long heven tasol. Nogat. Em i stap nabaut long dispela graun yet. Na olsem wanem yumi ken save? Bikos mak bilong em i stap. Yumi ken luksave long em long ol mak bilong em.

Mak bilong God em i olgeta samting yumi man i no inap mekim o wokim. Husat inap long wokim maunten o solwara o san o mun o sta o klaut na ren? Husat i givim pawa long man long kamapim narapela man? Mipela man i no save kamapim laip; God wanpela tasol inap. Em i mak bilong em; em i mak bilong em i stap. Olgeta samting i gat laip, ol i mak bilong God. Ol lip, ol sayor, ol tri, ol enimel, ol pis ol binatang, ol pisin: olgeta, God tasol inap wokim. Ol i mak bilong em. Yumi lukim ol; yu tingim em.

Olsem Sam 148 i tok:

"Olgeta samting i mas litimapim nem bilong God: san na mun na ol klaut na sno na maunten na ol tri na ol pisin na pis....olgeta i mas onaim God."

ol long we bilong ol stret. long rait na toktok planti long yumi olgeta plisman.

Siot bilong man, blaus na sket bilong ol meri. Mi no save tumas long pasin bilong ol T siot o ol singlis. Olsem na mi no ken toktok long en. Tingim gut dispela. Taim yu mekim olkain pasin bilong raskol na ol manmeri i no laik toktok wantaim yu. I no mi, olsem ol i amamas wantaim pasin bilong yu husat i save mekim dispela ol kain pasin nogut tru olsem.

Mi gat planti moa toktok tasol sapos mi raitim ol, bai i no inap fit long spes bilong Pas I Kam Long Edita.

Stanis K. Tiris,
Mai/Kimbe.

PLISMAN I STAP NA YU STAP

Dia Edita - Hia em mi laik helpim wanwok bilong mi em Aron bilong Wewak. Yes tru ol plisman i save wisil. Em i tru tumas. Mi no ken tok nogat. Na mi laik askim yu Maria. Plis mi no lukim adres bilong yu. Tasol susa mi rait tasol. Sapos yu bin lukim o nogat, yu mas isi



Graun karamap long haiwara

Wanpela de ol meri bilong Lonem i go long gaden na kamautim taro. Ol i kamautim taro pinis, tasol ol taro ya graun i pas pas nabaut olsem ol i karim i go daun long wanpela liklik wara na wasim ol gut.

Taim ol meri wasim i stap, ol pikinini bilong ol i wok long painim pis i go daun long wara. Ol i go nau na i painim wanpela bikpela graun pis indai na i trip antap long wara na ol liklik pis i wok long karim i go arere long dispela raun wara. Dispela raun wara em ol pipel ol i no save i go klostu o waswas long en, bikos masalai i stap.



stori bilong tumbuna

Graun pis indai long en ya, em i no graun pis tru em i bikpela man bilong ol. Tewel indai na ol liklik tewel i karim em i kam antap long dispela raun wara. Tasol ol pikinini i no save olsem ol i ting em i pis

tru. Orait ol i kisim dispela indai graun pis na i go givim long ol mama bilong ol. Na taim ol mama i wasim ol taro pinis, ol i kisim dispela indai pis wantaim taro na i go antap long ples.

Ol i kukim dispela indai graun pis na taim ol i katim long kaikai, pis ya em i pulap long blut. Blut em i olsem blut bilong man. Orait ol i kukim gen long paia tasol blut i no drai. Na ol i rausim pis long paia gen

na kaikai wantaim blut.

Ol i kukim kaikai pinis, na ol i go insait long haus bilong ol na i slip. Long nait nau ren i kam daun. Bikpela win i blo na klaut i pairap wantaim. Tasol ol i no save long wanem samting bai i kamap long ol.

National Dry-cell Batteries



BATERI em i samting yu ken karim i go long olgeta hap insait long redio o sutlam o teprikoda

BATERI i kostim liklik mani tasol.

NATIONAL BATERI i kam long faktori

bilong ol saveman i wokim ol

NATIONAL redio na kaset redio.

NATIONAL BATERI i no save lik, na

i save holim pawa longtaim.

Yu traim. Yu baim long:

 **National**

Distributors: **BURNS PHILP (New Guinea) LTD.**

Available at all Retail Stores.

Biknait nau na wara bilong ol raunwara i wok long i go antap long ples bilong ol. Wara i go antap na kilim olgeta pipel, ol dok, na ol pik bilong ol. Wara i go insait long haus na i go antap moa na karamapim olgeta samting bilong ol tu wantaim.

Tupela pipel tasol bilong dispela ples i ranawe. Tupela, em man wantaim wanpela meri. Tupela i go antap. Long moning, tupela i kam daun ranawe i go na ol i sindaun antap long ol maunten i stap tingting long tupela yet.

Nau ol i kolim dispela ples ya Lonem. Bipo ol pipel bilong Lonem i sindaun long Malan, klostu tasol long Jlipain. Taim ol pipel bilong Lonem i kam long lukim ol pipel bilong Jlipain, em bai ol i sanap tasol long ples Jlipain na lukluk i go long Malan. Ol graun ya nau em ol pipel bilong Jlipain i wok long en, em i bilong ol pipel bilong Lonem tasol.

Na sapos yu husat man o meri yu ting mi giamanim yu, orait, na sapos yu save long wanem man o meri bilong dispela tupela ples hia Lonem na Jlipain, em ol bai i stori gut long yu gen.

Leo Gilichibi,
Maprik.
Is Sepik Provins.

Memba bilong yu vot olsem wanem long palamen

Igut yu save memba bilong yu i vot olsem wanem long Palamen. Long taim ol i vot long mekim ileksen i kamap long dispela yia yet, 45 man i vot egens na 40 i vot yesa na 14 memba i no vot.

OL MEMBA HIA I VOT YESA, OL I LAIKIM NUPELA ILEKSEN:

Angmai Bilas
Anskar Karmel
Boyamo Sali
Donatus Mola
Ebia Olewale
Galopo Masa
Gavera Rea
Gedisa Gwaju
Gideon Apeng
Bruce Jephcott
John Kaputin
John Maneke
John Matik
John Poe
Josephine Abaijah
Julius Chan
Kaibelt Diria
Kobale Kale
Krenem Wonhenai
Kui Baiyang
Louis Mona
MacKenzie Daugi
Malengu Doi
Manasseh Voeto
Moari Kiki
Michael Somare
Naipuri Maina
Obed Boas
Oscar Tammur
Paul Lapun
Rena Ou
Philip Buseng
Pikah Kasau
Pita Lus
Reuben Taureka
Moses Sasakila
Sergius Arek
Stanis Toliman
Stephen Tago
Toni Ila
Toromble Kabai
Waitea Magnolius
Tim Ward
William Eichhorn
Yano Belo

OL MEMBA HIA I VOT NOGAT, OL I NO LAIKIM ILEKSEN:

Akepa Miakwe
Andagari Wabiria
Bewa Tou
Bono Azanifa
Brere Awol
Buaki Singeri
Damien Kereku
Harry Humphreys
Ibne Kor
Inuabe Egaiano
John Pokia
Joseph Iuanga
Kariql Bonggere
Koitaga Mano
Koriam Urekit
Lainus Hepau

Martin Tovadek
Matiabe Yuwi
Mek Nugints
Michael Pondros
Momei Pangial
John Middleton
Nenk Pasul
Ron Neville
Ninkama Bomai
Onamauta Beibi
Parua Kuri
Pato Kakarya
Paul Langro
Raphael Doa
Sinake Giregire
Suinavi Otio
Tei Abal
Thomas Kavali
Tombol Ungunaibe
Tore Lokoloko
Traimya Kambipi

Turi Wari
Wena Wili
Yakob Talis
DISPELA OL MEMBA I NO BIN STAP LONG PALAMEN LONG TAIM BILONG VOT NA OLSEM VOT BILONG OL I LUS.

Amenao Okona
Anton Parao
Dodobai Wautai
Barry Holloway
Iambakey Okuk
James Mopio
John Fifita
Kingsford Dibela
Marcus Kawo
Sno O'Shannessy
Perry Kwan
Ron Slaughter
Tom Koraea
Denis Young

Kot long skul

Watut Lokal Gavman Kaunsil long Morobe Provins i bin tok olsem, sapos ol pikinini i no go long skul bai ol papamama bilong ol i mas go kot.

Ol tisa bilong 5-pela komuniti skul long Watut Eria yet i bin givim dispela aidia long Kaunsil, long wanem ol i gat bikpela wari long ol pikinini i no kam long skul oltaim.

Ol pipel long ples i no klia tumas long as tru bilong edukesen. Planti tu i tok skul fi i antap tumas, na olsem ol i no inap baim skul bilong ol pikinini.

KISIM SINGLIS FRI baim National No.1 Radio



RL-295U

Sapos yu baim wanpela NATIONAL PANASONIC radio (RL-195 o RL-295U) bai yu kisim fri wanpela singlis i gat mak na yu kamap smat moa.

National Panasonic
RL-195/RL-295U



"Hi-Top" batteries are made especially for all National Panasonic battery-powered products.



Burns Philp
(New Guinea) Ltd.

SEPIK NIUS

Bikpela ragbi man dai

Man i gat bikpela namba long pilai ragbi long Wewak Mista Malaki Pora i bin dai long haus sik long 21 Jun.

Malaki Pora em i kam long Tari long Saten Hailans na em i joinim Difens Fos long 1971. Long mun Me em i stap long tim bilong Wewak taim ol i winim Lae na i pilai wantaim Madang tu. Pora i gutpela pilaya tumas, olsem na ol i putim em long bik-tim bilong Noten Son na em i go long Rabaul long bikpela pilai long olgeta son.



Long Rabaul Pora i kisim medal olsem namba wan man long pilai gut namel long 68 arapela man. Na ol i bin makim em long tim bilong PNG long go pilai long Nu Silan.

Long Rabaul long taim bilong pilai, wanpela man i bin kikim het bilong Pora. Na long Sande long Wewak tu het bilong em i bagarap gen na neks de em i dai.

Long Sande bihain, long 27 Jun, planti pilaya na pipel na ami i bung long ples pilai long Wewak long givim nupela nem bilong en, em: PORA RAGBI LIG OVAL. Ol tu i kirapim wanpela apil bilong helpim famili bilong em. Man i laik givim mani, i ken salim i go long:

The Pora Appeal
Box 193
Wewak.




Ol ragbi pilaya bilong Wewak wantaim Pater Austin bilong Ami i daunim het na tingting sori long Malaki Pora, taim ol i nemim nupela ples pilai.

WEWAK HELPIM

Helpim independens fan.....	K3,300.00
Helpim Timbunke Misin long muvi masin.....	500.00
Helpim Papua Niugini Yut long lidasip kos.....	300.00
Helpim baim donat masin bilong Wewak YC Senta.....	268.00
Salim wanpela meri i go long Agrikalsa kibung.....	90.00
Helpim baim ol skul buk bilong Samban Skul.....	50.00
Helpim baim muvi masin bilong YC Wewak.....	500.00
Helpim Bois Taun i go het.....	350.00
Helpim Dagua Haus Sik.....	2,200.00
Helpim long wokim YC basketball kot.....	3,000.00
Olgeta mani i kamap olsem.....	K30,358.00

INVESTMENT CORPORATION OF PAPUA NEW GUINEA



Poto antap i soim hetman bilong mipela long Rabaul, em John Darby, i toktok wantaim meri i bin baim sampela nupela sea.

YU KEN YUSIM MANI BILONG YU BILONG
BAIM SEA INSAIT LONG BIKPELA KAMPANI

- Em i save helpim kantri.
- Em i save helpim yu tu.

Long olgeta beng yu ken kisim moa save long pasin bilong baim sea. O yu ken rait i kam stret long mipela hia:

Investment Corporation
P.O. Box 155, Port Moresby

Plis, yupela salim sampela tok save i kam long mi, long pasin bilong putim mani insait long Invesmen Koporesen Fan.

NEM:

ADRES:

.....

23 kisim medal

Long 14 Jun Kwin i bin makim 23 pipel bilong PNG long kisim kain kain medal. Na mipela i gat nau wampela moa man mipela i kolim SIR, em Tei Abel. Ol arapela i kisim kain kain medal.

Medal C.B.E.

William KEARNEY (Moresby)
Jas bilong bik kot

Medal O.B.E.

Bisop Ravu HENAO (Moresby)
Wok olsem pasto
Pita LUS, (Maprik)
Wok politik
Advent B. TAROSI (Morobe)
Tisa longtaim
Dokta Ako TOUA (Moresby)
Wok dokta na helt

Medal M.B.E.

Denis BUCHANAN (Goroka)
Wok Turis
Bato BULTIN (Madang)
Lokal gavman
John MANEKE (Hoskins)
Wok politik
Samson PATILIU (Kimbe)
Wok Redio
Paul PORA-SCHMIDT (Hagen)
Lokal gavman wok
Mrs. Mila WALO (Alotau)
Wok wantaim ol meri
Mrs. Edith M. WATTS (Hagen)
Helpim ol meri na kot
(i go long pes 10)




**** Poto antap i soim Praim Minista wantaim meri bilong em i go sambai long marit bilong Mista Tony Voutas long Australia long Sarere, 12 Jun.**

Kirap long lephan long Pot, na yu ken lukim Mista Barry Holloway, (Spika bilong Palamen), Misis Ikini Holloway, Mista Tony Voutas, nupela Misis Voutas, Misis Veronika Somare, na Mista Michael Somare, Praim Minista bilong yumi PNG.

Mista Tony Voutas bipo em i memba bilong Haus Asembli na tu em i tis long Yunivesiti bilong Papua Niugini. Em yet i bin winim wampela setifiket long politik long Yunivesiti long Australia. Em i stap insait long namba wan lain man i bin kamapim Pangu Pati long yia 1967.

TOYOTA

WINIM OLGETA PMV LONG PNG



TOYOTA **ELA** 
MOTORS LIMITED

**Burns
Philp**
GROUP OF COMPANIES

STRUCTURE OF THE PAPUA NEW GUINEA GOVERNMENT



(NATIONAL GAZETTE NO. G15, 13 FEBRUARY 1976)

LEGISLATIVE

EXECUTIVE

JUDICIAL

HEAD OF STATE
 • QUEEN ELIZABETH II
 • GOVERNOR GENERAL, SIR JOHN GUISE, G.C.M.G.



TEACHERS' CORNER

Liklik ples salim nius i kam

(Johannes Namior i raitim).

* Poto daunbilo hia i soim wanpela bris em Ambenob Lokal Gavman Kaunsil long Madang Provins, i bin wokim long ol pipel long hap bilong Haimo. Ol pipel bilong 4-pela ples hia Auababa, Garegut, Gog, na Labdin, ol i wok hat long karim ol samting bilong wokim dispela bris olsem ol ain na waia, simen na waitsan. Na ol i helpim long ol wok bilong wokim dispela bris gut tru.

Mista Ahilo, wanpela kaunsila bilong dispela hap wantaim ol arapela kaunsila ol i opim dispela bris long wara Ubai long mun Epril. Ol pipel bilong ples Garegut ol i singsing Laloi, na bihain, ol i bung long wanpela bikpela kaikai tru long nait.



Ol meri Goroka statim kopi ba

Provinsal Komisina bilong Isten Hailans, Mista Bernard Borok, i bin tok olsem, longtaim em i bin opim nupela kopi ba bilong ol meri bilong Invesmen Koporesen long Goroka.

Em i bin tok, em i gutpela tru long ol meri i tok bisnis, long wanem, dispela samting i bihainim tru et poin plen bilong Gavman.

I gat 48 meri bilong Goroka i papa bilong dispela ba. Intanesenel Leba Oganaisesen na Yunaitet Nesens Developmen Program yet i bin helpim long kamapim dispela bisnis.

Kopi ba ya i stap stret long ples balus bilong Air

Siassi nius

Siassi Ailan i gat 90,000 hekta timba, na 9,025 pipel.

Ol forestri ofisa bilong Lae bai i go kibung wantaim ol pipel na kaunsil long stretim tok long kirapim gutpela bisnis bilong timba.

Niugini long Goroka. Taran-gu ol lain meri ya, i bin bungim mani inap olsem K4,000 olgeta long pas buk bilong ol, olsem na nau ol i bisnis bilong ol yet.

K I S I M M E D A L

(i kam long pes ?)

Medal B.E.M.

Saiden Tangaroba ITU (Boroko)

Wok plisman

Uandoa KAUSIK (Wewak)

Helt dipatmen wok

Saiden M. KOILAMUS (Rabaul)

Wok plisman

Mrs. Yana MINTS (W.Hailans)

Wok wantaim ol meri

Medal O.P.M.

Boin MERIRE (Moresby)

Wok plisman

Medal O.F.S.M.

Michael CORCORAN (Moresby)

Wok paiaman

Medal I.S.O.

F.N. W. ROLFE (Moresby)

Wok pablik sevis

Soldia Medal M.B.E.

Kepten H. KOMENG (Taurama)

W.O. Allan ANDO (Wewak)

Soldia Medal B.E.M.

W.O. Goliat TOLOM (Murray)

Buy the brand you can trust

maxell®



DISTRIBUTED IN PAPUA NEW GUINEA BY
HAGEMeyer (AUSTRALASIA) B.V.

P.O. Box 673, Madang
Phone: 82 2445

P.O. Box 63, Rabaul
Phone: 92 2633

P.O. Box 1428, Boroko
Phone: 25 6144

P.O. Box 90, Lae
Phone: 42 3200



Moa taim gen long redio

Long Jun 30, ol lokal redio stesin bilong yumi ol i bin stat long mekim gen 2 aua wok brotkas bilong ol long olgeta moning stat yet long 6 klok na i go inap 8 klok. Na gen long 5 klok apinun inap 10 klok nait.

Dispela i bihainim wanpela tok orait i kam long Nesenel Brotkasing Komisen em minista i bosim dispela wok, Dokta Reuben Taureka i bin mekim long mun i go pinis.

Tasol NBC redio long Port Moresby bai i no inap long

senisim ol aua long ol wok brotkas bilong en. Em bai i brotkas i go yet olsem bipo.

Em i olsem: long 6 klok moningtaim inap 2 klok apinun. Na long 4 klok inap 11 klok. Long Sarere na Sande, em i go long 6 klok moning, inap 11 klok nait.

Dokta Reuben Taureka i tok olsem, Nesenel Brotkasing Bot i bin katim ol aua bilong wok brotkas long mun Oktoba long yia i go pinis, bikos komisen hia i bin sot tru long mani.

Maket op long Sande nau

Arawa Taun Kaunsil long Bougainville i bin orait long nupela pasin bilong opim maket long Sande, stat long 8 klok na i go inap long 2 klok apinun.

Bipo ol manmeri i bin salim olkain samting ausait long haus maket long wanem em i pas long Sande. Na tu inap nau kaunsil i no bin singaut long maket fi bilong baim spes insait long maket. Nau bai ol i statim dispela pasin.

Kaunsil i no amamas long lukim planti pipel i kam lukim pilai long Sande i save sindaun nabaut long maket. Na tu ol man bilong pilai spot i save senisim klos bilong ol insait long haus maket yet, long wanem em i stap arere long ples pilai na i no gat haus spot bilong ol yet.



* Poto antap i soim Minista bilong Jastis, Mista Ebia Olewale, i givim presen long Mista Osineru Dickson insait long Sentral Gavman Haus, long Waigani, Port Moresby.


Osineru Dickson bilong ples Kwato long Milne Bay Provinces, i bin wok long gavman inap long 28 yia olgeta na long mun Me, em i pinistaim olgeta long wok bilong em.

Mista Dickson i bin wok long dipatmen bilong Sivil Affairs, na dipatmen bilong Lo. Mama i bin karim Osineru long 1909, na em i gat 67 yia olgeta. Em i go lapun nau.

Long dispela tasol, Mista Olewale i bin tok olsem: Mista Dickson i bin soim tru olsem Papua Niugini inap tru long mekim wok bilong em yet, na ranim gut dispela kantri bilong yumi, sapos ol Papua Niugini pipel bilong yumi yet inap long lukautim ol bikpela wok bilong gavman.

JVC MUSICAL PLEASURE


wanpela bilong yu stret




9437



9303E/R



9302E/R



9425

Olgeta samting yu laik painim insait long wanpela kaset redio rikoda, em yu ken painim long JVC.

Ol i no hevi, ol i isi long karim nabaut. Na ol i gat gutpela lautspika tru.

Yu go lukim long Hagemeyer bai yu inap painim wanpela bilong laik bilong yu stret. Na em bai stap planti yia moa. Yu laik win, yu kisim JVC.

9302E/R For people with get-up-and-go. Rich, clear sound, automatic level control, variable sound monitor, built-in microphone, flexible 3-way power system.

9303E/R Sturdy radio cassette recorder with best quality, solid state sound reproduction. Automatic level control, cue and review facilities. Mike mixing with independent volume control.

9437 Eye catching 3 Band Radio Cassette Recorder. Push button operation, built in microphone, auto stop, tape counter, tone control, variable monitor mixing.


9425 Advanced Radio Cassette Recorder featuring 2 speakers, Powerful "5" woofer 2" tweeter cellular horn, input mixing, auto stop, tape counter, built in microphone, AC/DC operation, auto head cleaner.



DISTRIBUTED IN PAPUA NEW GUINEA BY HAGEMeyer (AUSTRALASIA) B.V.

For further information write to:—
 P.O. Box 673, Madang Phone: 822445
 P.O. Box 63, Rabaul Phone: 922633
 P.O. Box 1428, Boroko Phone: 25 6144
 P.O. Box 90, Lae Phone: 423200

SAVEMAN TOKAUT LONG LAIKIM TOK PISIN



Profesa Tom Dutton

Long Tunde namba 11 de bilong mun Me, Profesa Datan i givim bikpela toktok bilong en long Yunivesiti bilong Papua Niugini. Profesa Datan em i wanpela saveman bilong olgeta tok ples bilong Papua Niugini na em i bosman bilong Dipatmen bilong Ol Tok Ples long Yunivesiti bilong yumi olgeta.

Long dispela bikpela tok-

tok bilong en em i toktok long wanpela samting em i bikpela tru long yumi Papua Niugini. Em i toktok long wanem tok ples bai em i kamap namba wan tok ples bilong yumi. Profesa Datan i ting olsem. Em i ting Tok Inglis i namba wan tok ples bilong PNG bilong toktok wantaim ol narapela kantri bilong askim long helpim na long bisnis na save na olgeta kain kain samting. Em i bikpela tok ples bilong ol yet na ol i no ken pasin em long PNG.

Tasol Profesa Datan i ting dispela i kosim PNG planti mani tumas long traime skulim olgeta manki long dispela tok na i gat planti wari i kamap long en tu.

DROPAUT WARI

Profesa Datan i tok planti pikinini tumas i save go long praimer skul na ol i save lainim Tok Inglis klostu inap long hap long olgeta de i go inap long

6-pela yia na bihain ol bosman bilong skul i rausim moa long hap bilong ol dispela pikinini. Ol i pasim rot bilong ol dispela i go antap long haikul.

INGLIS I TRIK

Bilong wanem ol i spendim planti mani nating olsem long skulim ol dispela pikinini long Tok Inglis? I no gutpela. Ol i no gat inap save long Tok Inglis bilong ritim buk long ples (maski i no gat buk, tasol sapos em i gat) na bilong painim wok long ples o long taun o long narapela hap. Tasol ol i ting em i gat na ol i go wokabout bilong painim wok. Ol i no laik i stap long ples na lukautim papamama bilong ol na helpim ol long wokim gaden samting. Nogat. Ol i bikhet na ol i save hambak nabaut tasol.

Na bilong dispela i no longtaim bai ol i kirap kros long olgeta arapela bilong wanem, ol i ting ol


i bin paulim laip bilong ol na pasim rot bilong ol long painim pinis planti mani, kago samting long Tok Inglis. Olsem na ol i kirap brukim ol lo bilong yumi. Ol i wok long stilim kaikai, mani samting long olgeta arapela. Dispela pasin i no gutpela laka? Em i kirap bagarapim gohet bilong kantri bilong yumi na yumi mas tingting planti long we bilong pasim dispela bagarap i kamap. I mobeta sapos gavman i painim nupela rot bilong skulim ol pikinini we i no gat ol dispela wari.

Profesa Datan i ting i mobeta sapos gavman i makim wanpela arapela tok ples i kamap strong bilong helpim wok i gohet insait long kantri bilong yumi. Profesa Datan i tingting planti long wanem tok ples i inap long dispela. Em i tingting long wan wan tok ples tru bilong yumi tasol ol i bilong wan wan hap na tu ol Papua Niugini i no laik lainim tok ples bilong na-
(i go long pes 14)

Wantok Buk 1975

LONG K5.00

(+ 60t. if airmailed = K5.60)



DISPELA BUK

- i gat 375 pes olgeta
- i win long sosal stadi
- i gat planti pot moa
- i gat independens stori
- i samting tru bilong wan wan klasrum
- olgeta laibreri i mas gat wanpela
- i gat 20 stori bilong ol tumbuna
- i pasim 23 WANTOK wantaim

Mi salim K _____ i kam; yupela i salim _____ WANTOK BUK i kam.

NEM:

ADRES:

.....
.....

WANTOK BOX 396 WEWAK

Ol lida kros long pasin spak

Kirap long mun Jun, ol bikman na ol lida bilong sios long Buin, long hap bilong Saut Bougainville, i bin tok olsem, planti ol yangpela pipel i bin brukim lo na bagarapim ol samting long pasin spak tasol.

Long wanpela miting bilong ol, 600 lida bilong ol viles, siaman bilong viles, na ol man i makim sios long Buin i bin tok, pasin spak i wok long kamap bikpela tru long ol pipel i stap long ol taun.

Long dispela tasol, ol lida bilong viles i bin tok, bai ol i raitim wanpela pas i go long Lika Laisensing Komisin, na askim ol long tekewe laisens bilong salim strongpela dring na larim pasin spak i pinis pastaim.

Na tu long wanem, i bin i gat planti ripot i tok olsem, ol spakman i save tromoim ston long ol haus, skul, ol misin stesin, haus sik, na tu long ol man i wokabout long rot.

Mista Nilkare bilong Bot bilong givim ol laisen bilong salim strongpela dring i tekewe olgeta laisens bilong salim bia samting inap long 2 mun long Buin eria.

Tasol bihain liklik wanpela lain yangpela pipel i kamap laik mekim trabel long wanpela stuakipa na tu long taun sapos em i no salim strongpela dring long ol. Gavman ofisa long Buin i tokim stuakipa long bi-

hainim laik bilong ol, nogut ol i mekim planti rong.


Long 29 Jun tupela DC3 pulap long plisman i kam long Rabaul bilong helpim ol tisa na famili bilong ol long lusim Buin Haiskul na i go, long wanem ol i painim planti trabel na wari tumas long han bilong ol spakman. Nau eduksen dipatmen i pasim dispela haiskul.



** Poto long raithan i soim Filip Sakalef (1) na Luke Gambu i wok long Sydney long bungim nupela muvi i soim ol independens selebren. Tupela i bilong Dipatmen ov Infomesen na i bin stap 6 mun long dispela wok. Film bai ran inap 60 - 80 minit long Inglis, Pisin, na Motu. I kostim K25,000 long mekim dispela kala muvi.*




Buy the brand you can trust



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

maxell LN C90

Low Noise Cassette Tape




P.O. Box 673, Madang
Phone: 822445

P.O. Box 63, Rabaul
Phone: 922633

P.O. Box 1428, Boroko
Phone: 56144

P.O. Box 90, Lae
Phone: 423200



"Coke em i samting tru"



N.G.I. INDUSTRIES LAE, AUTHORISED BOTTLERS OF COCA-COLA AND FANTA.



Bank South Pacific the Personal Service Bank

WE LOOK AFTER YOUR NEEDS FOR :

- * Cheque Accounts
- * Pass Book Accounts - earning interest
- * Interest Bearing Deposits, highest rates
- * Overdrafts and Personal Loans
- * Travellers' Cheques
- * Full International Services

CONTACT OUR MANAGERS AT :

Main office: Port Moresby
Branches: Boroko Mt. Hagen
Kieta Kundiawa
Lae Rabaul

DISPELA BENG BILONG SAUT PASIFIK I
NAMBAWAN BILONG LUKAUTIM MANI BILONG YU.
Yu traime

Bank of South Pacific

Incorporated in Papua New Guinea

maxell®

LONG LIFE BATTERIES



**For all Transistors
Torches·Tape Recorders
& Record Players**

HAGEMeyer (AUSTRALASIA) B.V.

P.O. BOX 673, MADANG BOROKO P.O. BOX 1428
Phone 82 2445 Phone 25 6144
P.O. Box 63, RABAUL P.O. BOX 90, LAE
Phone 92 2633 Phone 42-3200

SAVEMAN TOKAUT LONG TOK PISIN (i kam long pes 12)

rapela hap bilong PNG bilong wanem em i hat tumas (em i olsem lainim tok Inglis) na bilong wanem ol i no laik givim planti pawa long hap bilong dispela wanpela tok ples sapos ol i bin makim em.

TOK PISIN I WIN

Tasol i gat tupela tok ples i bikpela moa yet na planti manmeri bilong olgeta hap i save toktok long en long taim em i laik toktok wantaim man bilong narapela hap. Dispela tupela i Tok Pisin Hiri Motu. Tok Hiri Motu i bilong ol Papua tasol Tok Pisin i moa bikpela long Tok Hiri Motu bilong wanem i winim em long hamas manmeri i save toktok long en, na long em i kamap namba wan tok ples bilong Haus o Palamen.

Na tok Pisin gen i tok ples tru o namba wan tok ples bilong planti pikinini husat papamama bilong ol i lusim ples bilong ol pinis na i go wok long taun o narapela hap. Na bilong ol dispela, Profesa Datan i ting sapos Gavman bilong PNG i makim Tok Pisin i kamap namba wan tok ples bilong yumi long skulim olgeta long rot bilong kamapim kantri bilong yumi. Em i tok sapos gavman i mekim olsem, orait bai ol skul i stap olsem nau tasol bai ol i skul long tok ples na long tok Pisin tasol.

KOSTIM LIKLIK

Bai ol i raitim olgeta buk long Tok Pisin na toktok long Tok Pisin insait long skul bilong skulim ol studen long olgeta samting. Orait, na bihain long taim ol dispela sampela studen i winim ol kos bilong ol long praimer skul na long haiskul long Tok Pisin, orait, bai ol i ken skul Tok Inglis. Ol dispela i no planti na ol i ken kisim save long Tok Inglis kwiktai na i no kosim kantri planti mani tumas. Profesa Datan i ting em bai i kosim hap long Tok Inglis tasol.

PAPAMAMA KEN SKUL

Na tu long praimer skul

ol papamama i ken skul tu olsem ol i ken skul long laik bilong ol yet. Ol i ken mekim olsem bilong wanem ol tisa i no westim planti taim tumas long ol pikinini long Tok Inglis long olgeta de na ol i ken helpim papamama i kisim save tu olsem pikinini. Olsem na ol papamama i no save pret long ol pikinini i lusim ol long save na ol pikinini tu i no lusim tingting bilong lukautim papamama na gutpela pasin bilong ol. Olsem na Tok Pisin i gutpela bilong kamapim bung wantaim na gohet bilong kantri.

NA HIRI MOTU?

Tasol Profesa Datan i tok em i no isi long gavman em i makim Tok Pisin i kamap olsem bilong wanem i gat sampela wari bilong em tu. Wanpela wari i olsem. I gat sampela manmeri bilong hap bilong PNG ol i bin kolim ol Papua bipo na ol dispela i egens long Tok Pisin. Ol i tok, "Tok Hiri Motu em i bikpela tok ples bilong mipela na mipela i no laikim Tok Pisin. Mipela i laik holim Tok Hiri Motu bilong mipela yet."

Orait, na Profesa Datan i tok dispela tok em i orait tu, ol i ken holim Tok Hiri Motu bilong kamapim strong bilong hap bilong ol. Tasol bilong bung wantaim na kamapim strong bilong Papua Niugini stret i mobeta sapos i gat wanpela tok ples bilong ol tasol. Tok Pisin i no hatpela tumas long ol PNG. Ol manmeri i ken save toktok long en kwiktai na tu planti manmeri long Papua i save pinis long Tok Pisin na sapos yu go long ples bilong ol yu ken toktok long Tok Pisin o long Tok Hiri Motu.

I NO NUPELA SAMTING

Narapela wari i olsem: Sampela i tok dispela samting em i nupela tru na olsem wanem bai mipela i save wokim? Bai mipela i bagarap long en o nogat? Profesa Datan i tok, "Nogat, em i nupela samting bilong PNG tasol; em i no nupela samting bilong arapela hap.

(i go long pes 15)



* Hai Komisina bilong Australia, Mista Tom Critchley, i givim sek inap long K2,500 long Mista Lo Livong, wanpela tisa bilong Yunivesiti. Man i kam long gavman bilong Australia bilong trenim ol PNG long raitim stori na nius.

Yunaitet Nesens

Long Papua Niugini, yia 1975 i bin kamap olsem yia bilong Yunaitet Nesen Developmen Program long mekim olkain wok inap K1,200,000.

Long dispela mani tasol, UNDP i bin kirapim stadi long ol wok bilong bikbus na tu long timba eria bilong Vanimo, long Wes Sepik

Olsem tasol na Dipatmen

bilong Bisnis Developmen i bin trenim ol ofisa bilong en, na ol liklik bisnisan, na ol wokman bilong koporativ long pasin bilong ranim olkain wok.

Fopela arapela dipatmen bilong Yunaitet Nesens i bin helpim PNG long:

infomesen sevis, wokim rot na bris long bus, kukim na rekim kaikai, statim raba plantasin, statim wok long kamapim na hukim ol pis, wokim redio program long ol wok fama.

Somare no laikim tok pisin

Insait long palamen Mista Kaupa i bin askim Mista Somare long tingting bilong gavman long makim wanpela tok ples bilong PNG olsem nesanel tok ples. Na Praim Minista i bin tok olsem: "Mi ting yumi mas yusim Tok Inglis long skul na long bisnis na long toktok wantaim arapela kantri. Na mi no laikim Tok Pisin long wanem em i gat planti Tok Inglis insait long en. Mi ting planti yumi long olgeta hap i yusim Tok Inglis pinis, olsem mi laikim em i kamap nesanel tok ples bilong PNG."

Na taim em i mekim dispela tok, em i yusim tok pisin yet.

SAVEMAN TOKAUT LONG TOK PISIN (i kam long pes 14)

Ol i bin wokim em olsem long Indonesia na long Tansania. Bipo tok ples bilong dispela tupela kantri em i olsem tok Pisin na gavman i makim em pinis bilong kamap namba wan tok ples bilong ol na nau ol i skul long en na yusim em long wok bilong gavman insait long kantri.

Tasol Gavman bilong PNG i mas tingting pastaim. Em i mas tingting planti long wanem rot bai ol i kamapim

strong bilong kantri bilong ol." Profesa Datan i askim dispela kwesten na sutim em i go long olgeta bilong tingting. Em i tok, "Mi no ken duim ol PNG. Mi wait-skin na mi no ken tokim ol PNG i mas bihainim wanpela rot. Ol yet i mas tingting na bihainim laik bilong ol yet. Tasol nogut ol i no save i gat planti rot na ol i makim wanpela nating na ol i lus long dispela." Em tasol.

- Tom Dutton -

Aidia bilong pipel wokim lo

Long mun Jun yet, planti ol pipel bilong Papua Niugini i bin tokim Lo Rifom Komisin olsem, ol i laikim bai i mas i gat wanpela strongpela lo bilong ol pipel i brukim marit.

Minista bilong Jastis, Mista Ebia Olewale, i bin tok olsem, ol memba bilong Lo Komisin i bin pinisim ol miting bilong ol, na ol i salim dispela ripot bilong nupela lo i kam long em.


Bikpela tingting bilong Komisin em hia: ol pipel i brukim marit i mas baim kot inap long K100.

Tasol i gat planti arapela kain tingting long ol

miting bilong ol pipel na-baut long PNG.

Planti i laikim K200 na i no K100 olsem pe. Ol Hailans i bin tok, wanpela pik em i kostim inap K200 na olsem em i orait na inap. Tasol ol pipel bilong Kieta na Rabaul i tok K100 em i samting nating long man i kisim gutpela pe long taun. Long Lae ol i tok olsem pe i mas go inap K500 na long Kieta ol i putim arere long K1000.

Lo nau i go olsem: Arere bilong pe em K200. Man i no laik o i no inap baim, em i mas wok inap 4 wik long wanpela wok bilong ples o go long kalabus inap 6 mun.



* Poto antap i soim sampela ofisa bilong PNG i stap insait long miting bilong ol Plis Komisina long Darwin, long hap antap tru long Australia.

Kirap long lephan yumi lukim Greville Feeney na Sarry Mesa bilong PNG; William McLaren bilong Not Australia, na Moise Tuisawau na John Kelland bilong Fiji.

Ol komisina i bin tok long ol wari bilong plisman, long trening bilong ol, long pasin bilong bosim ol gan, na long wok plis bilong ol meri.

BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim K5 (\$5.00) i kam;

Nem:

Adres:

.....

Salim i kam long:

WANTOK - P.O. BOX 396 - WEWAK

≡ KING FEATURES SYNDICATE ≡

The Phantom

®

By Lee Falk and Sy Barry



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.